

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ إِلَّا اللَّهُ مُحَمَّدٌ رَّسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

04 Octobre 2019

05 Safar 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

AL-HUJURAT : GHIBBAT (PARTIE 4)

Tout d'abord, mo remercier Allah, ki Li pé donne moi le *Tawfiq* pou continuer mo Khutba Jummah ki mo fine commencer 3 semaines de cela. Dans mo Khutba Jummah vendredi passé, mo ti pé dire ou pou crée l'amour pou bane responsables du *Nizam-e-Jamaat* (bane ki pé travail pour la cause d'Allah).

Si ou ena ene vrai l'amour pour Allah, et stage par stage ou ena de l'amour pour Hazrat Muhammad (saws), Hazrat Massih Ma'oud (as), pour Allah So Khalifa de sa l'époque là (le Khalifatullah), bé naturellement ou pou ena l'amour pou bane ki pé travail pour le Jamaat (bane responsables du Jamaat) aussi. Li pas possible ki ene dimoune adopter l'arrogance ou soi l'indifférence à ene organisation ki ena connexion avec sa bane dimoune ki mo fine citer vendredi dernier là. Li pas possible ki ou cause contre le Jamaat, ridiculise bane responsables et faire le « *Ghibbat* » contre zot. Li pas possible ki lor sak ti zaffaire, ou cause contre le Jamaat.

Là-dans ena « *Ghibbat* » aussi, ena hypocrite aussi, et doucement, doucement sa vine rébellion aussi et mette fausses accusations aussi tombe là-dans même. Tous sa c'est bane maladies ki à peu près pareil. Et zot marche ensemble. Alor pas

penser ki cause ene dimoune derrière so le dos li ene simple zaffaire. Ou bizin reste complètement épargner de « *Ghibbat* ». Et ene façon pour faire sa c'est ki ou grandi ou relation d'amour. En ce ki concerne le *Nizam-e-Jamaat*, ou bizin ena *Mohabbat* ki ena référence avec l'amour pour Allah. Sa li ene zaffaire bien claire. Mais en ce ki concerne bane membres du Jamaat Ul Sahih Al Islam en général, là aussi ou bizin ena l'amour pou zot en référence avec ou l'amour pour Islam.

Plusieurs fois Hazrat Muhammad (saws) fine donne conseil et li dire ki ene musulman pas capave faire ene tel zaffaire à ene lotte musulman. Ene musulman pas capave cause ene tel di tort à ene lotte musulman. Avant mo ti pé un peu étonner lor là, ki Hazrat Muhammad (saws) ki li ene *Rahmat* pour tout l'univers, bé ki faire li pé mentionne bane bénéfiques juste pou bane musulmans? Ki faire li pé dire ki ene musulman bizin ena ene tel traitement à ene lotte musulman? Mais kan mo fine bien réfléchi lor là, mo fine trouver ki li ene très joli façon kot fine conseil bane musulmans. Malgré sa jolie conseil là, ki musulman pé prend sa compte azordi jour ? Zot plutôt pé la guerre entre zot, ena la haine, la jalousie, après zot dire ou zot ena l'amour pour le Saint Prophète (saws) !

Sa conseil du prophète là li vraiment jolie et important parski aux yeux du prophète, ene musulman bizin nécessairement et obligatoirement ena ene bon relation avec ene lotte musulman. Et sa relation d'amour là li pli ou moins diminuer aussitôt ki li senti li en dehors du cercle de bane musulmans. Relation là li la même mais li affaibli ene tigitte.

Alor c'est pourquoi kan donne bane conseils, donne li en référence avec bane relations pli solide. Li pas simplement veut dire ki ou pas bizin cause di tort à bane musulmans, mais pé dire ki même de loin péna même ene conception ki ou capave cause ditort ene musulman. Couma dire ene musulman cause di tort ene lotte musulman li ene zaffaire impossible. Donc, si ou faire sa, li ene péché. Et pas capave appelle ou ene musulman si ou cause bane les autres musulmans di tort.

Mais sa pas veut dire ki ou capave cause di tort à bane non-musulman ! Non. Pou sa ena bane les autres Hadiths, ena bane tels Hadiths kot sans référence de Islam fine mentionne droit de l'humanité en générale. Et pas seulement bane dimoune, mais fine mentionne aussi droit de bane animaux aussi. Fine mentionne ki même avec bane animaux bizin ena ene excellent traitement. Fine ena bane tels conseils kot Hazrat Muhammad (saws) pé dire à ene dimoune ki :

« To pou ena ene compte pou rendé au jour du jugement pou sa traitement ki to pé faire avec sa chamelle là. Façon ki sa chamelle la pé plainner, bé couma dire li pé faire plainte contre toi », et toute suite sa dimoune là fine libère chamelle la. Li fine faire *Taubah*. Li fine libère li et li fine décider ki : « *Jamais mo pas pou faire aucaine dominaire lor sa chamelle la.* » Lerla, Hazrat Muhammad (saws) fine dire li ki : « *Si to pas ti libère li, bé Allah ti pou attrape toi.* »

Même kan li ti pé tane ene cri douloureux d'ene z'oiseau, Hazrat Muhammad (saws) ti pé bouleverser. Li sorti de la tente et li fine demander ki sanlà fine cause la peine à sa femelle z'oiseau là. Li paraitre ki ene quelqu'un fine prend so dizef ou soi fine prend ene so petit. Et vraiment sa même ki ti arriver [Bane *Sahaba* ti prend sa z'oiseau là so deux petits depuis so nid]. Kan sa dimoune parmi sa bane *Sahaba* ki ti prend sa bane petits là fine remette sa dans nid z'oiseau là, lerla Hazrat Muhammad (saws) fine consoler. Sa c'est Hazrat Muhammad (saws), le *Rahmatul-lil-Aalameen*.

Donc, pas ena bane mots assez puissant pour définir l'expression : *Rahmatul-lil-Aalameen*, parski sa titre là c'est Allah même ki fine donne le Saint Prophète (saws) et li rempli avec bane significations extraordinaires. Nous pas capave traduire li ene sel façon. Donc, kan pé cause référence avec bane musulmans, li ene excellent façon pou faire zot *tarbiyyat* (l'éducation spirituelle) parski déjà zot ti bizin lier solidement, zot ena déjà ene relation bien établi. Et dans sa sens là même, kan nous alle dans ene cercle pli élargi, bé nous pou trouver ki le sujet de « *Ghibbat* » aussi mérite autant l'attention.

Li bien facile pou bien comprend sa pareil couma pas bizin faire le « *Ghibbat* » contre bane ki pé travail corps et âme pour la cause d'Allah, pou Allah So Jamaat, So *Deen*. Ou pas gagne droit aussi faire aucaine « *Ghibbat* » contre bane musulmans. Faire « *Ghibbat* » ene musulman en générale, li ene péché ki capave grandi.

Donc, ene musulman bizin servi bane excellents façons ki Nabi Kareem (saws) fine montré li et faudré pas ene musulman reste privée de sa excellent relation ki li bizin ena avec so bane frères musulmans. Et pour sa ou bizin prend référence l'amour Allah (swt) et So Rassool et ensuite ou bizin bien établi sa l'amour là avec tous bane musulmans et ensemble kot ou généralise sa l'amour là aussi avec l'humanité entière. Pareil couma bane musulmans ti pé gagne l'amour de Hazrat

Muhammad (saws), ou capave péna connexion direct are zot (c.à.d., bane musulmans là), mais ou revendiquer ki ou ena l'amour pou Hazrat Muhammad (saws). Si ou ena sa l'amour là, bé Quran dire ki Hazrat Muhammad (saws) ti extraordinairement souple avec bane musulmans ; li ti *Raouf* pou bane musulmans, li ena ene l'amour et beaucoup de tendresse avec zot et li aussi *Rahim* pour zot, c'est-à-dire, sak fois li ti pé faire miséricorde lor zot, li ti ena *Rehem* (pitié) lor zot.

Maintenant si ou ena l'amour pou Hazrat Muhammad (saws), bé ou bizin ena aussi l'amour pou bane ki Hazrat Muhammad (saws) ti content. En fait Hazrat Muhammad (saws) ti conne parfaitement la situation de so propre le cœur, li ti conner ki aucaine part li pas ti ena ene manquement dans sa bane zaffaires là. Li péna aucaine mauvais intention ki ena connexion avec la haine pour quelqu'un et jamais aussi li pas ti pé faire bane « *show* » pou montrer lizié dimounes, ni ti pé mette bane grand pano, faire badges pou montrer lizié dimounes ki li ena « l'amour pou tous et la haine pou personne ».

Et de l'autre côté li pas ti pé sème la haine dans le cœur les autres en appliquant le boycotte, faire « *Ghibbat* », casse relation familiale. Même ti ena bane *Sahaba* (musulmans) ki zot parent pas ti bane croyants, pas ti croire dans ene seul Dieu ni dans so message mais jamais li ti dire bane musulmans : Casse relation avec ou famille, mette boycotte lor zot, pas fréquente zot, sème la haine dans le cœur bane musulmans pou zot famille ou camarade ki pas ti croire dans so message. Mais parfois avec ene certain l'objectif, li ti obliger mentionne certaines zaffaires et sa li pas « *Ghibbat* » di tout. Li pas sa bane causer de la haine, ni boycotte etc., kot bane dimounes zoine ensemble et cause contre zot prochain. Non !

Donc nous aussi nous bizin ena sa l'amour pou tous bane ki Hazrat Muhammad (saws) ti ena l'amour là. En référence à sa, tous bane musulmans pé attane ki ou faire ene traitement de *Raouf* et *Rahim* are zot parski ou revendiquer ki ou ena l'amour pou Hazrat Muhammad (saws) ki ti *Raouf* et *Rahim*.

Donc, dans sa sens là, kan ou pou établi ou bane relations baser lor le bien, bé ou bane bon actions pou couma ene l'ombrage lor tous bane musulmans et sous sa l'ombrage là, le plant de « *Ghibbat* » pas capave même pousser. Ena certaines plantes ki mort sous certaine l'ombrage. Le plant de « *Ghibbat* » aussi pas capave développer sous la qualité de *Raouf* et *Rahim*.

Alor, sa c'est ene façon à évite le « *Ghibbat* ». Ensuite, kan ou grandi sa cercle là encore pour toute l'humanité, bé en référence avec le *Rahmatul-lil-Aalameen* ou pou bizin ena de bons relations avec toute l'humanité. Ou pas pou ena choix, et ici aussi mo pas pé mentionne bane l'amour artificielle. Non. L'amour artificielle péna aucaine réalité. Li ene zaffaire hypocrite c'est tout. Mais pou gagne vrai l'amour avec l'humanité, li ene zaffaire très profond. Li demande ene sorte de *Jihad* pour capave gagne sa. Maintenant faudré pas ou zoine le mot de *Jihad* avec *Mohabbat*, Non. C'est ki mo pé dire ou c'est ki l'amour naturel ki Hazrat Muhammad (saws) ti ena pou l'humanité, puisque li ti ena connexion directe avec Allah, et sa l'amour là ti pe déssane directement de Allah, bé li pas ti nécessaire faire aucaine la lutte pour sa.

Mo pou bizin arrête là-même. Par la grâce d'Allah, bane explications pé déssane couma la pluie et *Insha-Allah* li pou continuer la semaine prochaine. Allah (swt) conne mieux encore combien khutba pou ena lor sa sujet là. *Insha-Allah*.

Ki Allah répanne So pitié lor zot tous et aide zot pour combatte zot nafs, et établi bane bons relations entre zot bane frères et sœurs musulmans, et ki de plus, de même Jamaat, le Jamaat d'Allah, et ki zot aussi zot développe sa pitié là dans zot envers zot bane frères et sœurs et zot lutter pour reste loin de « *Ghibbat* » et de tous bane mals ki pou capave ternir (salir) l'image de l'Islam et de l'humanité ki Allah fine placer dans zot. *Insha-Allah, Ameen*.